



ВЫЛЬ СІЗЕН



ОТДЕЛ
РЕЛИГИОЗНОГО
ОБРАЗОВАНИЯ



ПАВЕЛ АПОСТОЛЛЭН РИМ КАРЫН УЛЙСЬЁСЛЫ ЫСТЭМ ГОЖТЭТЭЗ

1-тй ЛЮКЕТ

¹Павел, Иисус Христослэн ляльчиез, Инмарлэсь
Зеч Иворзэ тодытыны быръем апостолэз. ²Инмар
Аслаз пророкёсыз пыр, Священной Гожтэмьёсын
Зеч Иворзэ сётыны азьвыл ик сйзиз. ³Та Ивор
Солэн Пиез сярысь, асьмелэн Кузё-Инмармы Ии-
сус Христос сярысь. Адями лулмугорын Со Да-
видлэн кидысэз бордысь вордскиз. ⁴Духезья – Со
Инмар Пи. Инмар Пи луонэз бадзым кужымен
возьматэмын вал – Солэн кулэмысь улзыса султо-
нэз пыр. ⁵Иисус Христос пыр ми дэлет но апостол
луон басьтймы, Солэсь нимзэ дано карон, вань
калыкёсты Сола оскон пала берыктон понна.
⁶Иисус Христослэн өтемьёсыз пöлын тй но луись-
коды. ⁷Римын улйсь ваньмызлы Инмарлэн ярато-
но, вöсяськисьёс радэ өтем муртёсызлы: Инмар
Атаймылэн но Кузё-Инмарлэн Иисус Христослэн
дэлетэз, каньыллыкез тй бордын мед улоз.

⁸Нырысь ик, ваньды понна, тйляд осконды быдэс дунне выллы тодмо луэм понна, Иисус Христос пыр Инмарелы тау карисько; ⁹одйг Инмар тодэ, кызьы мон вань лулыным-сюлмыным Солэн Пиез сярысь Зеч Иворез тодытонын тыршисько. Тй ялан мынам сюлмам улйськоды. ¹⁰Ялан вöсяськыса курисько, тй доры куке но лыктыны Инмаре зеч эриксэ мед сётысал шуыса. ¹¹Мынам тйледыз туж адземе потэ: тйледыз юнматон понна кыче ке но духовной кузьым тйледлы сётыны мед быгатом, ¹²мукет сямен вераса, асьмелэн огъя осконнымы, огмес огмы юнматыны мед быгатомы шуыса. ¹³Агай-выньёсы, мынам тйледыз тодытытэме потэ: мукет калыкъёс дорын кадь ик, тй дорын но ас ужелэсь емышсэ бичаны мед быгатысал шуыса, мон трос пол тй доры лыктыны малпасько вал ини, – но та дырозь ялан кыче ке но могзетьёс сюрылйзы. ¹⁴Еллинъёслы но, варваръёслы но, визьмоослы но, нодтэмъёслы но мынам пунэм тыронэ вань. ¹⁵Озьыен, мон сярысь ке верано, тйледлы но, Римын улйсьёслы, Зеч Иворез тодытыны мон дась.

¹⁶Иисус Христос сярысь Зеч Иворез тодытыны мон уг возьдаськиськы, уго со Инмарлэн кужымез луэ. Со вань оскись муртъёсты уте, нырысь ик, иудейёсты, собере – мукетьёссэ калыкъёсты но. ¹⁷Евангелиын Инмарлэн шонерлыкес осконысь осконэ усьтйське. Гожтэмын уго: ”Шонер улйсь оскон пыр улэп улоз”.

¹⁸Инмысен Инмарлэн вожпотонэз зэмлыкез ёртыса-жикатыса возись адямиослэн котькуд сё-

лыксылы, лек ужзылы пумит ваське. ¹⁹Уго Инмар сярись мар тодыны луоно, соослэсь ватэмын өвөл: Инмар соослы Ачиз сярись Ачиз тодытйз. ²⁰Дуннез кылдытэм дырысен туннэ нуналозь Солэсь ужъёссэ чакласа-эскерыса адзыны луэ синмын адзыны луонтэм макеоссэ – Солэсь пумтэм вапумъёс улйсь кужымзэ но Инмар луонзэ, соин ик соослэн асьсэзыз шонере поттэмзы уг луы. ²¹Инмар луонзэ тодыса вылысь, Сое Инмарез кадь өз данъялэ, тау но өз каре, нош визьмынызы укылтэммызы, валасьтэм-нодтэм сёлэмзы съөдэкмиз. ²²Асьсэды визьмоесь шуо вал, нош асьсэос визьзэс ыштйзы. ²³Бырисьтэм Инмарлэсь пиштйсь данлыксэ соос сисьмыса бырись адямилэн, тылобурдоослэн, ньыль пыдын ветлйсьёслэн, нюж кыстйськисьёслэн тусбуйзылы укшась сульдэръёслы-идольёслы йыбыртъянэн воштйзы.

²⁴Соин ик соосты Инмар асьсэлэн съöлыкы мылкыд каронъёссылэн ки улазы сётйз но соос огогенызы мугоръёссэс юрзым ужен саптаны кутскизы. ²⁵Инмар зэмлыкслэсь палэнэ кожыса, соос öрекчи ужъёс пала берытскизы. Пумтэм вапумъёс ёже зэм ик данъяно Кылдытйсьлы интые, кылдытэм макеослы йыбыртъяны, ужаны кутскизы. ²⁶Соин ик Инмар соосты возьдаськоно юрзым кулэ каронъёс кие сётйз. Соослэн кышномуртъёссы кышномуртъёсын ик азон-калгон съöлыке пырылйзы. ²⁷Со выллем ик пиосмуртъёссы но. Кышномуртэз кулэ каронлэсь палэнтйськыса, огзы вылэ огзылэн мылкыдзы лөптылйз: пиосмуртъёс пиосмурт вылын юрзым азон съöлык лэсьто.

Асьсэлэн йыромем ужзы понна, соослы пачылаз пунэм берыктйське.

²⁸Инмарез визьмынызы тодэмзы потымтэ понна, Инмар соосты йырчукин берытскем визьзылэн ки улаз сётйз. Соин ик соос лэсьто сое, мае лэсьтыны уг яра. ²⁹Соос котькыче сьöлыко ужьёсын пачылмемын: азыса-калгыса улон, лекъяськон, кёттырмостэмъяськон, урод ужьёсын сörиськон, вожъяськон, адями виылон, керетыса-даллашыса улон, пöяськон, кескич сямо луон. ³⁰Соос лек кылоесь, юнме кыл вöлдйсесь, Инмарез адзонтэм карисесь, ултйясесь, ушьяськисесь, вылй мылкыдоесь, котькыче уродэз кылдытыны быгатйсесь, анай-атайлэсь кылзйськисьтэмесь, ³¹укылтэмесь, оскыны луонтэмесь, вожпоттонэн улйсесь, жалянэз тодйсьтэмесь. ³²Инмар законья таچه ужьёсты лэсьтйсьёс виыны ярамонэсь луо шуыса соос тодо, нош асьсэос, соосты лэсьтэм гинэ öвöl, озьы лэсьтйсьёслэсь мылкыдзэс лöпкытьяло на.

2-тй ЛЮКЕТ

¹Соин ик, мукет муртэ судить кариськод ке, тынад но сьöлыкед уг куштйськы. Уго кыче судэн мукетсэ судить кариськод, сычөөн ик астэ но судить кариськод, малы ке шуоно, мукетсэ судить кариськод, нош ачид соос кадь ик лэсьтйськод. ²Ми тодйськомы, таچه ужьёсты лэсьтйсьёс понна Инмарлэн судэз вань, со зэмлыко суд. ³Таچه ужьёсты лэсьтйсьёсты судить кариськод, нош ачид

со ужъёсты ик лэсьтйськод ке, Инмарлэн судэзлэсь ватйськыны тон быгатод шат? ⁴Оло тон кулэтэм кариськод Инмарлэсь туж бадзым зечлыксэ, га-жан-жалянзэ, кема чиданзэ? Уд валаськы шат Инмарлэн зечлыкез тонэ өбкельыса съöлыкъёслэсь куштйськонэ нуэ шуыса? ⁵Нош тон вог сямыныд, өбкелисьтэм сюлмыныд, вожпотон нуналлы, Инмарлэн шонерлыко судаз аслад вылад вожпотон люкаськод. ⁶Инмар котькудйзлы солэн ужезъя берыктоз. ⁷Зеч ужъёс лэсьтылыса, Инмар дорысь дан, сй-сан, быронтэм улон утчасьёслы, Со пумтэм вапумъёсы улон сётоз. ⁸Нош асьсэды яратыса, вогъяськыса, зэмлыклы тэрытскытэк, урод ужъёс лэсьтыса улйсьёс вылэ Со вожпотонзэ, йыркурзэ кисьтоз. ⁹Урод лэсьтйсь вань адями лульёс куректон-кайгу чидано, курадзоно луозы, нырысь ик, иудей, собере – мукет калыкъёс но! ¹⁰Котькудйзлы зеч лэсьтйсьлы дан, сй-сан, каньыллык, нырысь ик, иудейлы, собере – мукет калыкъёслы но! ¹¹Уго Инмарлэн огзэ яратыса, мукетсэ ултйян сямыз өвёл.

¹²Кинъёслы закон сётэмын öй вал но соос съöлыказы ке, соос законтэк ик бырозы но. Нош кинъёс законэз тодыса вылысь съöлыке пыризы ке, соос законъя ик судэ но сюрозы, – ¹³малы ке шуоно, законэз кылзйсьёс өвёл, законэз быдэсь-ясьёс Инмар азын шонере поттэмын луозы. ¹⁴Законзы өвёло язычникъёс шөдон-валанзыя законысь косонъёсты быдэсьяло ке, соос асьсэлы асьсэос закон, асьсэлэн гожтэм законзы ке но өвёл.

¹⁵Соос соин законлэн ужез соослэн сюлмазы

гожтэмын шуыса возматом. Со сярысь ик вера соослэн възьытлыксы, кукке соос малпанъёсынызы огзэс огзы я янгыше уськыто, я шонере потто. ¹⁶Инмарлэн адямиослэсь лушкем ужъёссэс Иисус Христос пыр судить карон нуналаз луоз озы, кызы мон тодытй Зеч Иворья.

¹⁷Тани, тон иудей шуыса нимаськиськод, тон закон вылэ оскиськыса улйськод, Инмарен ушъяськиськод. ¹⁸Солэсь эриксэ но тодйськод. Инмар законлы дышетскыса, тон тодыны быгатйськод мар со зечлык, мар со уродлык. ¹⁹Тон малпаськод, синтэмъёслы валтйсь, пеймыт азын улйсьёслы югытлык, ²⁰нодтэмъёслы валэктйсь, пиналъёслы дышетйсь луиськод шуыса. Тынад кияд тырмыт тодонвалан, зэмлык сётйсь закон вань шуыса оскиськод. ²¹Мукетъёссэ дышетйськод, нош малы тон астэ ачид уд дышетйськы? ²²”Эн лушка” шуиськод но, лушкаськиськод? ”Азыса-калгыса эн улы” шуиськод но, нош ачид азыса-калгыса улйськод? Сульдэръёслэсь-идолъёслэсь юрдйсько шуиськод, нош ачид соослэн куалаосысьтызы лушкаськиськод? ²³Инмар законэз тодэменыд ушъяськиськод, нош ачид со законэз сёрыса, Инмарез сантэмаськод? ²⁴Уго Священной Гожтэмын шуэмын: ”Тйледын сэрен язычникъёс Инмарлэсь нимзэ ултйяло”. ²⁵Вандйськон сямеэс быдэстон соку пайдаё, кукке законэз быдэсьяськод. Нош тон законэз сёрыса улйськод ке, соку тынад вандйськемед вандйськымтэ луэ. ²⁶Озыен, вандйськымтэ мурт Инмар законлэсь косонъёссэ быдэсья ке, соку солэсь вандйськымтэзэ вандйськем шуыса Инмар уз гож-

ты-а? ²⁷Вандйськон сямеэ ортчйтйсьтэм калык Инмар законэз быдэсьяса улэ ке, со тонэ, закон тодйсь, вандйськон сямеэ ортчйтйсь но Инмар законэз сөрыса улйсь иудеез, судить кароз. ²⁸Уго зэмос йудей өвөл со, кин вылтусызъя гинэ иудей. Зэмос вандйськон но өвөл со, кудйз вылласянь, мугор вылын гинэ. ²⁹Өвөл! Зэмос иудей со, кудйз лулыныз-сюлмыныз иудей луэ. Вандйськон но зэмосэз со, кудйз сюлэмын. Законлэн куронэзъя өвөл, духен лэсьтэмын. Таچه адямиез калык уз ушъя, Инмар ушъялоз.

3-тй ЛЮКЕТ

¹Озьыен, иудей луонлэн вань-а вылйлыкез, вандйськонлэн нош мар пайдаез? ²Котьмар ласянь но вылйлыко луыны мугзы вань. Нырысь ик, соослы Инмар кыл оскемын. ³Мар-о бен? Куд-огъёсыз Инмарлы оскиськымонэсь өй ке вал, соослэн оскиськымон луымтэзы быдтоз-а Инмарлэсь оскиськымон луонзэ? ⁴Нокызы но уз. Котькудйз но адями – өрекчи, нош Инмар оскиськымон, Священной Гожтэмын верамын:

”Кылан-веранэн тон шонерлыко луод, судэ сётйзы ке, вормисе потод”.*

⁵Нош асьмелэн шонертэм ужъёсмы Инмарлэсь шонерлыксэ эшшо но мургес усьто ке, оло нош Инмар шонертэм лэсьтэ, куке вожпотонзэ асьме

вылэ кисьтэ? Тае адями визьмын верасько. ⁶Öвөл, озьы öвөл. Озьы ке луысал, соку кызыы Инмар дуннеез судить карыны быгатысал? ⁷Нош мынам шонертэм ужъёсы пыр Инмарлэн зэмлыкез будэ, Солэсь данзэ эшшо но вылие жутэ ке? Соку мар понна монэ сьöлыкко мурт шуыса судить кароно на? ⁸Оло нош зечлык мед кылдоз шуыса урод ужъёс лэсьтоно? – Кызыы куд-огез ми сярись урод кыльёс вöлдо но шуо, ми, пе, солы дышетйськомы. Таёе муртьёслы но шонер суд дасямын.

⁹Мар-о бен? Асьмеос, иудейёс, мукет калыкъёслэсь умоесьгес-а? Чик но öвөл! Уго ми оскымон возматймы ни, кызыы ке иудейёс, озьы ик ел-линъёс но, ваньзы сьöлыклен ки улаз шуыса. ¹⁰Священной Гожтэмын шуэмын:

¹⁰Шонер лэсьтйсьез чик öвөл, одйгез но öвөл;

¹¹валасез но öвөл; нокин но Инмарез уг утча;

¹²ваньмыз шонер сюрес вылысь кожизы,

номырлы ярантэмесь луизы:

зечсэ лэсьтйсьез öвөл, одйг но öвөл.*

¹³Соослэн ньылонзы – усьтйськем шайгу;

кылынызы öрекчасько;

сьöd кыйлэн ядэз кыл улазы.*

¹⁴Кылзы-ымзы каргаськонэн, лекъяськонэн

пачылмемын.*

¹⁵Вир кисьтыны пыдъёссы шаплыесь;

* 3:10-12 Пс. 13:1-3.

* 3:13 Пс. 5:10; 139:4.

* 3:14 Пс. 9:28.

¹⁶соослэн ортчем бервылазы
куашкан но бырон кыле;

¹⁷тупаса улонлэсь сюрессэ соос уг тодо.*

¹⁸Соослэн син аязы Инмарлэсь кышкан өвөл”.*

¹⁹Но ми тодйськомы, закон мар ке вера ке, со
Инмар законлы тэрытскыса улоноослы вера,
ваньмыз ымъёссэс мед ворсалозы но быдэс дунне
выл Инмар азын янгыш мед луоз шуыса, ²⁰малы
ке шуоно, законлэн куронъёсызъя лэсьтэм ужъё-
сыныз нокудйз но адями Инмар азын шонере уз
поты; уго Инмар закон пыр сьöлыкес тодыны
кутскиськод.

²¹Нош али закон сяна, Инмарлэн шонерлыкес
усьтйськыз. Со сярысь закон но, пророкъёс но
иворто. ²²Инмар азын шонере потон Иисус Хрис-
тослы оскон пыр ваньмыз понна, ваньмызлы ос-
кисьёслы сётйське, нокинэ но висъятэк-люкытэк,
²³малы ке шуоно, ваньмыз сьöлыке пыремын, Ин-
марлэн данэзтэк кылемын, ²⁴нош Аслаз гажан-
жалянэныз Инмар ваньзэ шонере поттйз, Иисус
Христос пыр соосты сьöлыкъёслэсь мозмытйз.
²⁵Инмар Сое курбон луонлы дасяз, ваньзэ Солы
оскисьёсты Солэн Вирыныз дун-чылкыт карон
понна. Тазы Инмар Аслэсьтыз шонерлыкесэ возь-
матйз: азьвыл лэсьтэм вань сьöлыкъёсты Со куш-
тйз, ²⁶Аслаз кема чидаса улон дыръяз. Аслэсьтыз
шонерлыкесэ али дыре возьматйз: Со Ачиз шонер

* 3:15-17 Ис. 59:7-8.

* 3:18 Пс. 35:2.

лэсьтйсь, Со ик Иисуслы оскисьёсты шонере поттйсь.

²⁷Маин бен табере ушъяськыны быгатйськомы? – Номырин но. Со быдтэмын. – Кыче законэн? Ужъёсты курись законэн? – Öвөл, оскыны косйсь законэн. ²⁸Ми лыдъяськомы уго, законлэн ужъёсызтэк но, оскон пыр, аядми шонере потыны быгатэ шуыса. ²⁹Нош Инмар, оло, иудейёслэн гинэ Инмарзы, язычникъёслэн öвөл? – Озыы öвөл. Язычникъёслэн но Со Инмарзы. ³⁰Инмар – одйг. Со вандйськемъёсты осконзыя шонере поттэ, вандйськымтэосты но, осконзы ке вань, шонере поттэ. ³¹Озыыен, ми законэз оскон пыр оло быдтйськомы? – Нокызыы но ум быдтйське. Ми законэз юнматйськомы оскон пыр.

4-тй ЛЮКЕТ

¹Мар бен соку асьмелэн вашкала атаймы, Авраам сярись вераломы, кудйз бордысь ми потэмын? ²Авраам аслаз ужъёсыныз шонере потйз ке, со соин ушъяськыны быгатэ, нош Инмар азын уг быгаты. ³Уго мар шуэ Священной Гожтэм? ”Авраам Инмарлэн верам кылызлы оскиз, та солы шонерлык шуыса гожтйськиз”. ⁴Ужась муртлы дун тырон – со кузьым сётон öвөл, со ужезлэсь дунзэ берыктон. ⁵Кин ужъёсыз вылэ уг оскиськы, нош Инмарлы оске, Солы оскиське, Кудйз янгыше сюрисез янгыше сюрисьтэм каре, – со муртлы осконэз шонерлык шуыса гожтйське. ⁶Давид но

шудо шуыса нима сыће адямиез, кудзэ Инмар,
ужез шоры учкытэк, шонер улйсь шуыса лыдья:

⁷”Шудоесь, киньёслэн законлы пумит ужьёссы
ңушемын,

киньёслэн сьöлыкёссы шобыртэмын.

⁸Шудо со мурт, кудйзлы Инмар
сьöлык уз гожты”.*

⁹Таће шудо луон вандйськемьёслы-а, яке ван-
дйськымтэослы-а сётйське? Ми шуиськомы, ”ос-
кон пыр Авраам шонер улйсь шуыса гожтйськиз”.

¹⁰Ку гожтйськиз? Вандйськем бераз-а, яке вандйсь-
кемезлэсь азьло-а? Вандйськем бераз öвöл, ван-
дйськон сямеэ ортчытэмеэ азьло гожтйськиз.

¹¹Со вандйськон сямеэ ортчытйз, но со уж оскон
пыр гинэ шонере поттйсь пус, печать луиз, нош
солэн осконэз вандйськон сямеэ ортчытэмеэ азьло
ик вал ини. Тазы Авраам ваньмызлы Ин-
марлы оскисьёслы атай луиз, Кудйз соослэсь но
осконзэс шонерлык шуыса лыдяз, соос вандйсь-
кымтэ ке но. ¹²Тазы Авраам вандйськемьёслэн,
солэн осконэзлэн пыты куяз ветлйсьёслэн атай-
зы луиз. Соос вандйськон сямеэ гинэ öвöл, нош
Авраам атаймылэсь осконзэ но кабыл басьтйзы,
кудйз вандйськон сямеэ ортчытэмеэ азьло ик
вал ини.

¹³Уго Авраамлы но солэн кидысэзлы дуннелэсь
люкетсэ басьтйсь луон закон пыр сйземын öй вал,
оскон пыр сйземын вал, кудйныз со шонере потйз.

¹⁴Закон былэ оскиськыса улйсьёс люкет басьтйсьёс

* 4:7-8 Пс. 31:1-2.

луо ке, соку оскон пайдатэм, сйзиськон – номыр сётйсьтэм луэ; ¹⁵уго закон йыркуръяськон поттэ, малы ке шуоно, кытын ке закон өвөл, отын йыруж лэсьтон но өвөл.

¹⁶Сйзиськон оскон понна сётэмын. Со Авраамлэн вань выжыосызлы Инмарлэн кузьымеэ, законлы тэрыткисьёслы гинэ өвөл, нош соослы но, кинёс Авраам кадь осконэн уло. Со ваньмылы асьмелы атай луэ, ¹⁷Гожтэмын тазы шуэмын: ”Трос калыкёслы атай карыса Мон тонэ пуктй”. Со Инмар азын, Кудйзлы со оскиз, асьмелы атай луэ, – Инмар азын, Кудйз кулэмьёсты улэп каре, мар азьвыл ой вал, сое улыны өте. ¹⁸Ноқыче но оскиськон ой ке но вал, Авраам оскиз но трос калыкёслы атай луиз, кызы Гожтэмын верамын: ”Сокем трос луоз тынад выжыед”. ¹⁹Солэн осконэз өз лябзы, со өз но малпа солэн, сю ареслы матэ вуэмлэн, мугорыз куасьмемын-кулэмын ини, Сарралэн но пушкыз кемалась куасьмемын ини шуыса; ²⁰Инмарлэн кыл сётонэзлы со оскиз, оскытэк өз улы; осконэз сое юнматйз но со Инмарез данъяса улйз, ²¹Инмар сётэм кылзэ быдэстоз шуыса юн оскиз. ²²Соин ик ”Инмар солэсь осконзэ шонерлык шуыса гожтйз”. ²³Нош Гожтэмысь та кыльёс: ”Шонерлык шуыса гожтйз,” солы огназлы гинэ верамын ой вал, асьмелы но верамын вал. ²⁴Асьмелэн осконмы шонерлык шуыса гожтйськоз, – асьмелы, Солы оскисьёслы, Кин Иисусэз, Кузё-Инмармес кулэмьсь улзытыса султытйз, ²⁵Кудйз асьмелэн сьолькёсмы понна виыны сётэмын вал, но, асьмеды шонере поттон понна, улзыса султйз.

5-тй ЛЮКЕТ

¹Озьен, оскон пыр шонере потыса, Кузё-Инмармы Иисус Христос пыр табере асьмелэн Инмарен тупаса улонмы вань. ²Осконмы ванен, Иисус пыр асьмеос дэлет басьтонэ пырыны быгатйсьёс луимы. Со дэлетэн улйськомы но Инмарлэн данлыказ пыронлы оскиськонэн ушьяськиськомы. ³Таин гинэ өвёл, куректон-кайгуосын но ушьяськиськомы. Тодйськомы уго: куректон-кайгу бордысь чидан потэ. ⁴Чидан бордысь быгатон-тодон потэ, быгатон-тодон бордысь – оскиськон, ⁵нош оскиськон възьытэ уг вутты, малы ке шуоно, Инмар Аслэсьтыз яратонзэ асьмелы сётэм Святой Дух пыр сюлэмьёсамы кисьтэ. ⁶Уго Христос, асьмеос, сьöлыкоос понна, кукке асьмеос кужымтэмесь на вал, Инмарлэн тупатэм дыраз кулйз. ⁷Уго шонер улйсь понна кин ке но кулоз меда; нош зеч лэсьтйсь понна, оло, кин ке но кулыны дйсьтйсь вань? ⁸Но Инмар Аслэсьтыз асьмемыз яратэмзэ та пыр възьматйз: Христос асьме понна кулйз, кукке асьмеос сьöлыкoesь на вал! ⁹Соин ик, Солэн Вирыз пыр асьмеос, шонере потэмьёс, уката табере, Со пыр Инмарлэн вожпотонзэзлэсь утемын луомы. ¹⁰Уго, эшшо тушмоньяськыса улон вакытамы, Солэн Пиезлэн кулонэз пыр, асьмелэн Инмарен кусьпъёсмы тупатскизы. Табере уката ик, – кусьпъёсмы тупатскем бере, Иисулэн улонэз пыр утиськон басьтомы. ¹¹Та гинэ өвёл! Асьмеос Инмарен ушьяськиськомы, нош та ушьяськонмы Кузё-Инмармы Иисус пыр луиз, Со валлин асьмелэн Инмарен кусьпъёсмы тупатскизы.

¹²Соин ик, кызыы одйг аядми пыр дунне вылэ съöлык пыриз, нош съöлык пыр кулон лыктйз, соин сэрен, кулон вань аядмиос доры вуиз, малы ке шуоно, вань аядмиос съöлыказы. ¹³Уго закон сётон дырозь но дунне вылын съöлык вал; нош закон öвöлтэм дыръя съöлык янгыш каронлы уг гожтйськы. ¹⁴Адам бордысен Моисей дырозь но кулон кузёяськыса улйз, – Адамлэн йыружезлы тупась съöлык лэсьтымтэос вылын но. Адам Лыктонолэн (Иисуслэн) тусбуез луэ.

¹⁵Но Инмарлэн дэлетэзлэн кузыимез йыружлы уг укша. Уго, одйг аядмилэн йыруженыз сэрен трос муртъёс быризы ке, соку уката, Инмарлэн дэлетэз но одйг Аядмилэн, Иисус Христослэн дэлето кузыимез, тросэз вылын пачылмыса улэ. ¹⁶Инмарлэсь кузыимзэ Адамлэн съöлыкаменыз ёшатыны но уг луы. Уго огезлэн одйг гинэ йыружез судэ, янгыш карыса виёнэ вуттйз, нош дэлетлэн кузыимез – трос йыружъёслэсь мозмытыса шонере потон ваиз. ¹⁷Одйг муртлэн йыруж лэсьтэм понназ кулон кузёяськыса улыны кутскиз ке, соку уката ик, одйг Аядми пыр, Иисус Христос пыр кузёяськыса улозы Инмар дорысь туж бадзым дэлет но шонере потон басьтйсьёс. ¹⁸Зэм ик, кызыы одйг муртлэн йыружез вань аядмиосты судэ сётонэ вуттйз, озыы ик одйг Аядмилэн шонерлыко ужез вань аядмиосты судысь мозмытэ но соослы улон сётэ. ¹⁹Уго, кызыы одйг муртлэн кылзйськымтэеныз сэрен трос аядмиос съöлыко луизы, озыы ик, Одйг Аядмилэн кылзйськонэз троссэ аядмиосты шонер улйсь кароз. ²⁰Закон берло

пыриз, йыруж мед йылоз шуыса. Нош кытын сьӧлык йылйз, отын Инмарлэн гажан-жалянэз туж бадзым луиз. ²¹Кызыы сьӧлык бӧрсяз кулонэз вайыса кузёяськыса улыны кутскиз, озыы ик Инмарлэн но гажан-жалянэз шонер улон пыр валтыса улыны кутскоз но Кузё-Инмармы Иисус Христос пыр быронтэм улонэ нуоз.

6-тй ЛЮКЕТ

¹Мар бен вераломы? Гажан-жалян мед йылоз шуыса, оло, асьмелы сьӧлыкаса ик улоно-а? ²Уг, ноказыы но уг яра. Асьмеос сьӧлыклы кулймы. Кызыы нош со пушкын асьмеос азыланяз но улыны быгатомы шат? ³Уд тодйське шат ваньмы асьмеос Иисус Христос бордын пылатйськемьёс, Солэн кулонэныз пылатйськимы? ⁴Озыы, асьмеос пылатон пыр Соин чӧш кулймы но Соин чӧш асьмеды ватймы. Кызыы Христос Инмар Атайлэн пиштйсь данлыкезлэн кужыменыз кулэмысь улзыса султйз, озыы ик табере асьмеос но выльдйськем улонтй ветлыны мед быгатомы. ⁵Уго асьмеос Солэн кулонэзлы укшась кулонэн кулймы но озыы Соин герзаськимы ке, соку Со выллем ик кулонысь улзыса султомы. ⁶Тодйськомы сое: сьӧлыко лулмугормылэн кужымез мед быроз но асьмеос сьӧлыклэн ляльчиосыз медам ни луэ шуыса, вужмем вашкала адями луонмы Соин чӧш кортчогаськыса кулйз-быриз. ⁷Уго кулэм мурт сьӧлык уг ни лэсьты. ⁸Асьмеос Христосэн валче кулймы

ке, оскиськомы, Соин валче ик уломы но шуыса. ⁹Тодйськомы, Христос кулэмысь улзыса султэм бераз уг ни кулы: Со вылын кулонлэн кужымез өвёл ини. ¹⁰Уго, Со кулйз ке, сьöлыкез пыраклы быдтон понна кулйз. Нош Со али улэ, Инмар понна улэ. ¹¹Озы ик тй но асьтэдыз сьöлык бастонлы кулэмын шуыса лыдьялэ, нош Кузё-Инмармы Иисус Христос бордын Инмар понна улэп шуыса.

¹²Озыен, тйляд кулоно мугорады сьöлык кузёяськыса медаз улы, солэн юрзым куроньёсызлы тй тэрытскыса медад улэ. ¹³Мугордылэсь одйгзэ но люкетсэ шонертэм улонлэн ки улаз сьöлыканы эн сётэ. Нош асьтэдыз, кулэмысь улземьёсты кадь, Инмарлы сётэ. Мугор люкетъестэс но шонерлыко улонлэн ки улаз сётэ, Инмарлы ужан-тыршон понна. ¹⁴Сьöлык тйледын кузёяськыса медаз улы. Тй уго закон улын өвёл, тй Инмарлэн гажан-жалянэз улын улйськоды.

¹⁵Мар-о бен? Сьöлыканы кутскомы-а, уго асьмеос закон улын өвёл ни, Инмарлэн гажан-жалянэз улын? Ум, ноказыы но ум. ¹⁶Оло тй уд тодйське, кызыы тй асьтэдыз кинлэн ке но ки улаз ляльчие сётйськоды но, зэм ик, соку тй ляльчи луиськоды солы, кинлы тэрытскиськоды. Яке соку тй кулонэ нуись сьöлыклен ляльчиосыз луиськоды, яке шонер улонэ нуись тэрытскыса улонлэн ляльчиосыз? ¹⁷Азьвыл тй сьöлыклен ляльчиосыз вал. Инмарлы тау, табере вань сюлмыныды сыче дышетонлы тэрытскиськоды, кудйз кие тй сётэмын. ¹⁸Сьöлыклен ляльчиез луонлэсь тй моз-

мытэмын, шонер улонлэн ляльчиосыз табере тй луиды. ¹⁹Тйляд лулмугордылэн лябезлы луыса, валамон кылын верасько. Кызыы тй мугор люкетъестэс юрзым, кырсь ужъёслэн ки улазы сётйды, законлы пумит улыны кутскиды, табере мугор люкетъестэс шонер улонлэн ки улаз сэтэ, дунчылкыт возе. ²⁰Уго, куке тй сьольклэн ляльчиосыз вал, соку тй шонер улонлэн палэназ сыйськоды вал. ²¹Соку кыче емышьёс будэтйды? – Сыче емышьёс, кудъёсызлэсь табере асьтэос возьдаськиськоды, малы ке шуоно, соос кулонэ-быронэ вутто. ²²Нош али, куке тй сьольклэсь мозмытскиды но Инмарлэн ляльчиосыз луиды, тйляд емышты – дун-сьольктэм луон. Со быронтэм улонэ вуттэ. ²³Уго сьольк вае кулон-бырон, нош Инмарлэн кузьымез пумтэм вапумъёсы Кузё-Инмармы Иисус Христос бордын улон луэ.

7-тй ЛЮКЕТ

¹Агай-выньёсы, оло тй уд тодйське-а, – законэз тодйсьёслы тае верасько, – адями улэп дырря гинэ закон соин кузёяськыны быгатэ шуыса? ²Шуом, бызем кышномурт улэп кузпалыз борды законэн думемын; нош кузпалыз кулйз ке, со мозмытске картэз борды думыса возись законлэсь. ³Соин ик, улэп кузпалыз вань дырря мукетызлы бызиз ке, азэм мурт шуыса нимаськоз. Нош кузпалыз кулыса, мукетызлы бызе ке, со законлэсь мозмытскемын но сое азэм мурт шуыны уг ни луы. ⁴Озыы

ик тй но, агай-выньёсы, Инмарлы емыш мед ваёмы шуыса, Христослэн мугорыз пыр, кулэмысь Улзыса Султэмлэн ки улаз сюрон понна, законлы кулды. ⁵Уго, кукке лулмугорлэн куронъёсызъя улймы, соку законэн лөпкытэм сьöлыкò жуатскем мылкыдъёс, кулонлэсь емышсэ ваён понна, мугор люкетъёстймы ветлйзы. ⁶Нош табере закон понна кулыса, кудйз асьмеды пленын возе вал, асьмеос солэсь мозмытскимы, – вашкала вужмем буква я öвöл, нош духен выльдйськыса, асьмеос Инмарлы служить мед каромы шуыса.

⁷Мар бен шуомы? Закон бордысь-а потэ сьöлыкò? Уг, ноказыы но уг, закон юрттэмен гинэ мон тодй мар со сьöлык. Закон öй ке шуысал: ”Кулэ эн кары”, сьйче кулэ каронъёсты мон öй но тодысал. ⁸Нош сьöлыкò курон-косон пыр муг шедьтыса, мон пушкы котькыйче но мылкыд каронъёс кылдытйз. Уго закон ке öвöл, сьöлыкò но улэп öвöл. ⁹Кукке но мон законэз тодытэк улй. Нош кукке курон-косон лыктйз, соку сьöлыкò улзйз, ¹⁰нош мон кулй. Улон ваён понна сётэм курон-косон мыным кулон ваиз, ¹¹малы ке шуоно, сьöлыкò муг шедьтыса, курон-косон пыр монэ öрекчаз но со пыр ик монэ вииз. ¹²Озыен, закон святой луэ. Курон-косон но святой, шонерлыко, зечлыко.

¹³Соку, зечлыко закон мыным кулон ваиз-а? Öз, ноказыы но öз! Но сое сьöлыкò ваиз, кудйз ассэ возьматйз сьйчеен, кыйче со зэмзэ ик вань: зечлыко закон пыр мыным кулон ваиз. Озыен, курон-косон пыр зеч валаны луэ, макем сьöлыкò-юрзым со сьöлык. ¹⁴Уго асьмеос тодйськомы Инмар закон

духовной луэ шуыса. Нош мон луллэсь-мугорлэсь кылдэмын но сьӧлыклэн ки улаз вузамын. ¹⁵Мон уг валаськы мар лэсьтйсько; малы ке шуоно, мае лэсьтэме потэ, сое уг лэсьтйськы, нош мае си-назькыль-адзонтэм карисько, сое лэсьтйсько. ¹⁶Нош лэсьтйсько ке сое, мае лэсьтэме уг поты, соку мон законэз шонерлыко шуыса лыдьясько. ¹⁷Зэмзэ ке верано, сое мон уг лэсьтйськы, мон пушкын улйсь сьӧлык лэсьтэ. ¹⁸Тодйсько уго мон пушкын, мынам лулмугорам, жечез уг улы шуыса; малы ке шуоно, жеч лэсьтыны мылкыды вань, но сое лэсьтыны уг лэсьтйськы. ¹⁹Жечез, кудзэ лэсьтэме потэ, уг лэсьтйськы, нош уродэз, кудзэ лэсьтэме уг поты, лэсьтйсько. ²⁰Лэсьтйсько ке сое, мае лэсьтэме уг поты, соку мон сое уг ни лэсьтйськы, мон пушкын улйсь сьӧлык сое лэсьтэ. ²¹Таже югдурен пумиськоно луисько: кукке жечез лэсьтэме потэ, соку мон борды урод думиське. ²²Лулыным-сюлмыным мон Инмар законлы шумпотйсько; ²³нош мугор люкетъёсысьтым мукет законэз адйсько, кудйз визьмылэн законэзлы пумитьяське но монэ мугор люкетъёсам интыяськем сьӧлык законлэн ки улаз кутыса возе. ²⁴Куанер мискинъ адыми мон! Кин монэ та кулоно мугорлэсь мозмытоз? ²⁵Инмарелы тау карисько – сое Со Кузё-Инмармы Иисус Христос пыр лэсьтйз. Озы, ачим мон визьмыным Инмар законлы тыршисько, нош лулмугорыным – сьӧлыклэн законэзлы ужасько.

8-тй ЛЮКЕТ

¹Озъиен, табере Иисус Христос бордын улйсьёслы, лулмугорлэн куронэзъя өвёл, Духлэн валтэмезъя улйсьёслы, но кыче но суд өвёл ни, ²малы ке шуоно, улон ваись Духлэн законэз Иисус Христос пыр сьöлыклен законэзлэсь но кулонлэсь монэ мозмытйз. ³Уго лулмугорлэн лябеныз сэрен, закон кужымтэм вал, соин ик Инмар Аслэсьтыз Пизэ сьöлыко лулмугорлы укшась лулмугорын сьöлык-лы пумит ыстйз но лулмугорысь сьöлыкез пырак-лы судэ сётйз. ⁴Законэн гожтэм шонерлык асьме пушкын мед быдэсмоз, – лулмугорлэн куронэзъя өвёл, но Духлэн валтэмяз улйсьёс бордын. ⁵Уго лулмугорлэн куронэзъя улйсьёс лулмугорлэн кулэяськонъёсыз сярысь малпасько, нош Духлэн валтэмезъя улйсьёс – Духен улон сярысь. ⁶Лул-мугорлэн кулэяськонъёсызъя улон кулонэ-быронэ нуэ, нош Духлэн валтэмезъя улон улэп улон но каньыллык вае. ⁷Лулмугорлэн кулэяськонъёсыз сярысь сьулмаськись адями Инмарлы пумит туш-моньяськыса улэ; уго Инмар законлы со уг тэ-рытскы, уг но быгаты тэрытскыны. ⁸Соин ик лул-мугорлэн кулэяськонъёсызлы тэрытскыса улйсьёс Инмарлы ярамонэсь уг луо. ⁹Инмарлэн Духез зэм-зэ ик тй пушкын улэ ке, тй лулмугорлэн куронъ-ёсызъя уд улйське, Духлэн валтэмезъя улйськоды. Кинлэн бордаз Христослэн Духез өвёл ке, со Со-лэн муртэз уг луы. ¹⁰Христос тй пушкын улэ ке, соку мугор сьöлык пыр кулэмын луэ, нош дух улэп улэ шонер улон пыр. ¹¹Иисусэз кулэмысь

улзытыса Султытйсьлэн Духез тй пушкын улэ ке, соку Христосэз кулэмысь Улзытйсь, тй пушкын улйсь Аслаз Духеныз тйлесьтыд но кулэм мугорьёстэс улзытоз.

¹²Озыен, агай-выньёсы, асьмеос лулмугорлэн пунэм тыроно муртьёсыз өвөл, асьмелы лулмугорлэн кулэяськонъёсызъя улыны уг яра. ¹³Уго лулмугорлэн кулэяськонъёсызъя улйськоды ке, соку кулоды, нош лулмугорлэсь сьöлыко ужьёссэ Духлэн юрттэменыз виылйды ке, соку улэп кылёды. ¹⁴Ваньмыз, Инмарлэн Духезлэсь кылзйськыса улйсьёс, Инмарлэн нылпиосыз луо; ¹⁵малы ке шуоно, тйляд басьтэм Духты со зйбетын улонлэн духез өвөл, кудйз тйледыз кышкатыса эшшо но мед возысал. Озы өвөл, уго тйледлы сётйськем Дух тйледыз Инмарлэн нылпиосыз кариз! Со Духен ик асьмеос вазиськиськомы: "Авва, Атае!" ¹⁶Асьмеос Инмарлэн нылпиосыз шуыса Ачиз та Дух асьмелэн духенымы ёош иворто. ¹⁷Нош нылпиосыз ке, соку локет басьтйсьёс но, Инмарлэн локет басьтйсьёсыз, Христосэн ёош локет басьтйсьёс луо. Соин ёош курадзиськомы ке, Соин ёош данэ но потомы.

¹⁸Малпасько, туннэ нуналысь та огдырлы сётйськем курадзонъёсмес ёошатыны но уг луы вуоноеныз данлыкэн, кудйз асьмелы усьтйськоз. ¹⁹Инмарлэн кылдытэм дуннеез чидатэк вите Инмар нылпиослэсь данлыксылэсь усьтйськонзэ, – ²⁰малы ке шуоно, вань кылдытэм макеос ас мылкыдзья сисьмоно-быроно улон ки улэ өз сётске, – соос понна сыёе вал Инмарлэн эрикез,

²¹Инмар нылпиослэн кадь ик данлыко эрикез басьтон понна, вань кылдытэм макеос сисьмонлэн зйбет улысьтыз мозмытэмын луозы шуыса оскиськонэн. ²²Тодйськомы, кызы вань кылдытэм дунне туннэ нуналозь нуны ваись кадь жуштэ, курадэе. ²³Со гинэ өвөл, асьмеос но, Духез – Инмарлэсь нырысетй кузьымзэ басьтйсьёс, Инмарлэсь асьмеды Аслыз нылпи каронзэ витыса, ас мугормылэсь мозмытонзэ возьмаса, асьмеос но лулынымы-сюлмынымы лулзылйськомы. ²⁴Уго асьмеос оскиськон пыр утемын. Нош оскиськон, кудйз быдэсмемын ни, со оскиськон өвөл: адями мае ас синмыныз адэе ке, соку кулэ на-а солы оскиськон? ²⁵Нош асьмеос оскиськиськомы ке солы, мае ум адзиське, соку чидаса возьманы кулэ.

²⁶Лябзыса улонъёсмы дыръя Дух но асьмелы юрттэ. Уго асьмеос ум тодйське мар сярысь, кызы кулэ вöсяськыны, нош Дух асьме понна кыл вератэк лулзиськылыса, асьмелы дурбасьтэ.

²⁷Сюлэммес Эскерись тодэ Духлэсь малпанзэ, малы ке шуоно, Со вöсяськисьёс понна дурбасьтэ, озы, кызы кулэ Инмарлы. ²⁸Нош асьмеос тодйськомы: Инмарез яратйсьёслы, Солэн Ас эрикезъя өтемъёслы, – ваньмыз зечлы берытске.

²⁹Уго соосты Со кылдэмзылэсь азьло ик тодйз но Аслаз Пиезлы укшась луыны эрик сётйз. Озы Солэн Пиез трос агай-выньёс пöлын нырысь вордскем Нуны луиз. ³⁰Кинъёсты Со азьло ик бырйиз, соосты ик отиз. Нош кинъёсты отиз, соосты шонере поттйз. Нош кинъёсты шонере поттйз, соосты ик данэ поттйз.

³¹Мар бен талы шуод на? Инмар асьме палан ке, кин асьмелы пумит луыны быгатоз? ³²Нокин но уз. Уго Со, Кудйз Аслэсьтыз Пизэ өз жаля, асьме понна Сое курадзыны сётйз, соку кызы бен Соин чош асьмелы ваньзэ мукетсэ но уз кузьма? ³³Инмарлэсь быръемъёссэ кин янгыше уськытыны быгатоз? Нокин но уз. Инмар соосты шонере поттэ. ³⁴Кин соосты судить каре? Нокин но уг. Христос (Иисус) кулйз, но улзыса султйз. Со Инмарлэн бур палаз, Со ик асьме понна дурбасьтэ. ³⁵Христослэн яратонэзлэсь кин асьмеды люкоз: куректон-кайгу-а, яке ёртыса возён, яке уल्याса возён, яке сютэм улон, яке куанере кылён, яке кышкытлык, яке меч? Кызы Священной Гожтэмын шуо:

³⁶"Тон понна нуналлы быдэ милемыз виыло; милемыз вандыны дасям ыжъёс шуыса лыдьяло".*

³⁷Но ваньзэ тае асьмемыз Яратйсьлэн кужыменыз вормиськомы. ³⁸Мон уго юн оскисько: кулон но, улон но, кылчинъёс но, кутсконъёс но, кужымъёс но, туннэ нунал но, вуоноез но, ³⁹жуждала но, мурдала но, нокрыче но мукет кылдытэм маке но асьмемыз Инмарлэн яратонэзлэсь люкыны уз быгатэ, кудйз улэ Кузё-Инмармы Иисус Христос бордын.

9-тй ЛЮКЕТ

¹Мон Христослэн адямиез, соин ик мае верасько, – со зэм. Уг öрекчаськиськы, Святой Духен тыр улйсь сьулэмы но со сярись вера. ²Туж бадзым кöтжожен улйсько, чик дугдылйсьтэм куректон мынам сьулмам улэ. ³Агай-выньёсы, лулмугорзья мыным чыжы-выжы луисьёс понна анафема басьтыны но Христослэсь люкемын луыны но мон дась. ⁴Со – Израиль калык уго, соосты Инмар Аслыз нылпилы бырйиз, соослы данлык, сйзён-косоньёс, закон, храмын вöсяськон, сйзиськоньёс сётйз. ⁵Соослэн атайёссы – патриархьёс. Соос дорын лулмугорын Христос вордскиз. Со – ваньмызлы Инмар луэ, пумтэм вапумьёсы ушьяно-даньяно, аминь.

⁶Инмарлэн кылыз медаз быдэсмы, – озьы ноку но уг луы. Израиль атай бордысь потэмьёс но ваньзы Израильлы зэмос нылпи уг луо, ⁷Авраам атай бордысь потэмьёс но ваньзы зэмос нылпи уг луо. Инмар Авраамлы шуиз уго: ”Исаак бордысь потэмьёс тынад кидысэд шуыса нимаськозы”. ⁸Мукет сямен вераса, ваньмыз Авраамлэсь вордскем нылпиос но Инмар нылпи шуыса уг нимасько. Израильлэн зэмос нылпиосыз шуыса нимасько Инмарлэн сйзиськемез пыр вордскем нылпиос гинэ. ⁹Нош сйзиськонын тазы шуэмын: ”Вуоно арын та дыре ик лыкто, соку Сарралэн пи нуныез вордскемын луоз”. ¹⁰Одйг та гинэ öвöл. Тазы ик Ревеккаен но луиз, куке со атаймылэсь, Исааклэсь кыкто нылпи вайыны секытэн луиз.

¹¹Соос өз на вордске на вал, номыр зечсэ но, уродзэ но өз на лэсьтэ, – Инмарлэн бырйыны эрикез ¹²ужъёс бордысь уг поты, со Ётисьлэн эрикез бордысь потэ. Ревеккалы верамын вал: ”Бадзымез пиед покчиезлы ляльчи радын улоз”. ¹³Кызыы гожтэмын но: ”Иаковез мон яратй, нош Исавез адзонтэм кари”.

¹⁴Мар бен шуомы? Оло Инмар дорын шонертэм ужъёс? Ёвёл. Нокызыы но ёвёл. ¹⁵Уго Инмар Моисейлы шуиз: ”Кинлы зеч кареме потйз, солы зеч каро; кинэ жаляме потйз, сое жаляло”. ¹⁶Озыен, ужпум со бордын ёвёл, мар каремез потэ, мар лэсьтыны тырше аядми, нош ваньмыз Инмарлэн гажась-жалясь ки улаз. ¹⁷Уго Священной Гожтэмын Инмар фараонлы шуэ: ”Тон вылын Аслэсьтым кужымме возматон понна, Аслэсьтым нимме быдэс дунне вылэ тодытон понна Мон тонэ вылй карыса эксэе пуктй”. ¹⁸Тйни озыы, кинлы Солэн зеч каремез потэ, зеч каре; нош кинлэсь сюлэмзэ чурытомытэмез потэ, сое вог сюлэмо каре.

¹⁹Тон мыным шуод: ”Мар понна эшшо соку Со кинэ ке янгыше уськытэ на? Уго кин Солэн эрикезлы пумит султыны быгатоз?” ²⁰Нош тон аядми, кин тон сыче, Инмарен ченгешиськод? Горшок горшок лэсьтйсьлы шуоз-а: ”Малы тон монэ тазыы лэсьтйд?” ²¹Горшок лэсьтйсь уг быгаты шат одйг нелькем суйысь ик одйгзэ сосудзэ чылкыт маке возён понна, нош мукетсэ кырсь маке возён понна лэсьтыны? ²²Озыы ик Инмар но Аслэсьтыз кужымзэ, йыркурзэ возматаныны мылкыд кариз, но туж кема чидаса улйз сузмытыны дасям, ”йыр-

куръяськон поттйсь сосудьёссэ”.²³Но Со тае чидаз Аслаз ”гажано-жаляно сосудьёсыз” понна, кудьёсызлы Со Аслаз пиштйсь данлыкезлэсь быдзымлыксэ возматыны мылкыд кариз, – соослы, кудьёссэ Со азыпал данлык басьтонлы дасяз.²⁴Асьмеос, иудейёс пöлысьёс гинэ öвöл, язычникъёс пöлысьёсты но Со öтиз уго.²⁵Кызы Осия пророк пыр Инмар шуэ:

«Аслэсьтымтэзэ калыкез Аслам шуо,
яратымтэзе – яратэм шуо;*

²⁶Со интыын, кытын соослы шуэмын вал:

”Тй Мынам калыке öвöл”,

– табере соосты Улэп Инмарлэн нылпиосыз шуозы».*

²⁷Нош Исаия Израиль сярысь шуэ: ”Лыдынызы Израиль пиос зарезьысь луо мында ке но луизы, ог люкетэз гинэ утиськоз.²⁸Кузё-Инмар быдэстоно ужез пумозяз жегатскытэк, шонер йылаз-пумаз вуттоз музьем вылын”.²⁹Кызы Исаия азыпалзэ тодытыса вераз:

”Кузё-Инмар Саваоф быръем муртьёссэ

асьмелы öй ке кельтысал,

асьмеос Содом кадесь луысалмы,

Гоморралы укшасесь луысалмы”.*

³⁰Мар бен шуомы? Шонере потонэз утчасьтэм язычникъёс шонере потон басьтйзы. Оскон пыр шонере потон.³¹Нош закон пыр шонере потонэз

* 9:25 Ос. 2:23.

* 9:26 Ос. 1:10.

* 9:29 Ис. 1:9.

утчась Израиль шонерлыклен законэз дорозь өз вуы. ³²Малы? Малы ке шуоно, шонере потонэз оскон бордысь өз, законлен ужёсыз бордысь утказы. Канжаськон из борды соос канжаськызы, ³³кызы гожтэмын:

”Тани, Сйонэ канжаськон из,
визь сынаськон из понйсько;
нокин но Сола оскись мурт возытэ уз усы”.*

10-тй ЛЮКЕТ

¹Агай-вынъёсы! Вань сюлмыным вёсяськыса Инмарлэсь курисько Израилез утыны. ²Мон соос сярысь ивортйсько: Инмар сярысь сюлмаськон-тыршонзы вань, нош зэмос валанзы өвёл. ³Уго, Инмарлэсь сётэм шонерлыксэ тодытэк, асьсэлэсь шонерлыксэс пуктыны тыршыса, соос Инмарлен шонерлыкеслы өз тэрытске. ⁴Христос – законлен пумыз луэ, – котькудзэ оскись муртэз Со шонере поттэ.

⁵Закон пыр шонере потон сярысь Моисей гожтэ: ”Законэз быдэсьяс адыми соин улэп улоз”. ⁶Нош оскон пыр шонере потон сярысь Священной Гожтэмын тазы шуэмын: ”Аслад сүлэмад эн шуы: ”Кин Инме тубоз?”, – Христосэз васькытон понна; ⁷яке: ”Кин дуннелэн пыдэсаз васькоз?”, – Христосэз кулэмысь жутон понна. ⁸Нош мар шуэ Гожтэм?

* 9:33 Ис. 28:16.

”Инмар кыл тыныд матын,
тынад кыл йылад, тынад сюлэмад”*
– со осконлэн кылыз, кудзэ тодытйськомы. ⁹Кы-
лыныд-ымыныд Иисус – Со Кузё-Инмар шуыса
калыклы ватытэк вералляд ке, Инмар Сое кулэ-
мысь улзытыса султытйз шуыса ас сюлмыныд
оскид ке, – утиськод. ¹⁰Уго кин сюлмыныз оске,
со шонере потоз, нош кин кылыныз-ымыныз ка-
лыклы ватытэк вера, со утиськон басытоз. ¹¹Уго
Гожтэм шуэ: ”Нокин но, Солы оскись мурт, во-
зытэ уз усы”. ¹²Иудей но иудей луисьтэм калыкь-
ёс куспын нокыче пöртэмлыкез öвöл, малы ке
шуоно, ваньмыз понна – одйг Кузё-Инмар, Солы
вазиськисьёслы Со шырыт сямо луэ. ¹³Уго ”Кузё-
Инмарлэн нимызлы котькудйз вазиськись, утись-
коз”.

¹⁴Но кызы вазиськод Солы, Кинлы уд оскись-
кы? Кызы оскод Солы, Кин сярысь кылэмды
öвöл? Нош тодытйсь-ивортйсь ке öвöл, кытысь
кылод? ¹⁵Нош ыстэмын ке öвöл, кызы соослы
тодытод? Кызы Гожтэмын: ”Кыче чебересь
пыдьёссы тупаса улонэз, Зеч Иворез тоды-
тйсьёслэн!” ¹⁶Но Зеч Иворез ваньмыз санэ öз понэ.
Уго Исаия шуэ: ”Кузё-Инмаре! Милям тодытэм-
мылы кин оскиз?” ¹⁷Озы, оскон потэ тодытон
бордысь, нош тодытон – Инмар кыл пыр. ¹⁸Но
юасько: ”Соослэн кылэмзы öвöл шат?” Озы öвöл,
соослэн кылэмзы вань, уго ”быдэс музейем вылэ

* 10:6-8 Втор. 30:12-14.

соослэн куаразы вöлмиз, дуннелэн пумозяз соослэн кыльёссы”.* ¹⁹Эшшо юасько на: ”Израиль öз тоды шат?” Нырысь ик Моисей шуиз:

”Калык пыр, кудзэ калык но шуыны уг луы, тйлесьтыд сюлмаськон-тыршондэс вырзыто, валасьтэм-нодтэм калык пыр вождэс потто”.*

²⁰Исаия но кышкатэк шуэ:

”Монэ утчасьтэмьёс Монэ шедьтйзы,

Мон сярысь юалляськисьтэмьёслы

Мон усьтйськи”.*

²¹Нош Израиль сярысь Инмар шуэ: ”Кылзйськисьтэм, вог калыклы Мон быдэс нунал чөже киосме вöльясa улй”.

11-тй ЛЮКЕТ

¹Озьыен, мон юасько: ”Оло нош, Инмар Аслэсьтыз калыксэ палэнтйз?” Öз, ноказыы но öз. Мон но уго Израиль пи, Авраамлэн кидысэз бордысь, Вениамин выжыысь. ²Инмар Аслэсьтыз калыксэ öз палэнты, кудзэ Со азьвыл ик тодйз. Оло, тй уд тодйське, мар шуэ Священной Гожтэм Илия сярысь вераназ? Кызы со, Илия, Израиль вылэ жожтйськыса Инмарлы шуэ: ³”Кузё-Инмаре! Тынэсьтыд пророкьестэ виылйзы, курбон сётон интыостэ куашкатъязы. Мон огнам кыли, табере

* 10:18 Пс. 18:5.

* 10:19 Втор. 32:21.

* 10:20 Ис. 65:1.

мынэсьтым лулме быдтыны утчало”.⁴ Мар бен солы Инмар шуэ: ”Мон Аслым сизьым сюрс муртэ бырйи, кудьёсыз Вааллы өз йыбырттэ”.⁵ Инмарлэн гажан-жалянэныз та дыръёсы но быръем люкет возиське на. ⁶Инмарлэн гажан-жалянэз пыр ке, соку ужьёсья өвёл; малы ке шуоно, соку ини гажан-жалян дугдэ гажан-жалян луэмысь. Нош ужьёсья ке, со гажан-жалян өвёл ни, уго соку уж но уж өвёл ни. ⁷Мар бен? Израиль мае утчаз, сое өз шедьты. Быръемъёс шедьтйзы. Нош мукетъёс чурит-вог сюзэмоесь луизы, ⁸кызыы гожтэмын:

”Инмар соослы умме усён духез ыстйз;
синъёс сётйз, кудьёсыныз уг адзо,
пельёс, кудьёсыныз уг кыло,
туннэ нуналозь но”.*

⁹Давид но шуэ:

”Сиён-юон жутыкузы сьёлтэтэ,
вотэсэ, кычесэ мед сюрозы,
пунэм берыктон соос вылэ мед вуоз!

¹⁰Син азызы пеймыт мед луоз, медаз ни адже;
сюрлызэс пырак чожелы куасалты”.*

¹¹Озыен, юасько: пыраклы усён понна-а, оло, соос канжаськызы? Өз, пыраклы өз. Но соослэн усеменызы сэрен язычникъёслы утиськон лыктйз, соос пушкын сюзлмаськон-тыршонэз бугыртон понна. ¹²Нош соослэн усёнзы дунне понна узырмон* ке, начармонзы но язычникъёс понна узыр-

* 11:8 Втор. 29:4; Ис. 29:10.

* 11:9-10 Пс. 68:23-24.

* 11:12 Татын вераськон мынэ духовной узырмон сярысь.

мон луэ, соку нош тыр луонзы эшшо но бадзымгес узырмон луоз.

¹³Тйледлы, язычникъёслы, верасько: мон язычникъёслэн апостолзы луисько, со уженым мон даньяськисько. ¹⁴Лулмугорыя ас выжы калыкме сюлмаськыса-тыршыса улонлы уг-а вырзыты, соос пöлысь куд-огзэс уг-а быгаты утыны? ¹⁵Соослэн куштйськонзы – дуннелы Инмарен тупаса улон ваиз ке, соку мар луоз, соосты Инмар кабыл карыса кутйз ке, – кулэмысь улзыса улон öвöл-а со? ¹⁶Вöсяны ваем нырысез емыш дун-чылкыт луиз ке, соку ваньмыз кылемез но емыш дун-чылкыт луэ. Писпу выжыос дун-шектэмесь ке, соку вайёсыз но дун-шектэмесь.

¹⁷Улвайёс пöлысь куд-огзэ чигыса уськытылйзы но тонэ, ас эркад будйсь кыр маслинаез, соос интые лякызы ке, соку тон, лякиськем улвай, маслинапулэн выжыеныз но солэн сокеныз вожектыса сылйськод. ¹⁸Чигтылэм улвайёс азын астэ вылйе эн пукты. Астэ вылйе пуктйськод ке, соку тодад вай: тон выжыез уд возиськы, выжы тонэ возе. ¹⁹Шуод: ”Улвайёсты чигтылйзы монэ лякон понна”. ²⁰Умой. Соос оскымтэзы понна чигтэмын вал, нош тон осконэд ванен лякиськыса возиськиськод. Кышкаса ул, эн вылтйяськы. ²¹Уго Инмар маслинапулэсь бордаз будэм ас вайёссэ öз жаля бере, учкы, жалялоз-а тонэ?! ²²Озыен, эн вунэты: Инмар зечлыко но, кылэз юн юаны быгатйсь но луэ. Куштйськисьёслэсь кылзэс юн юа. Нош тон Солэн зечлыкезлы оскиськыса улйид ке, зечлык басьтод. Озыы öд ке улы, тон но чогыса куштэмын

луод. ²³Соос но, оскытэк өз ни ке улэ, лякемын-бурмытэмын луозы, малы ке шуоно, соосты нош ик лякыса бурмытыны Инмарлэн бадзым кужы-мез вань. ²⁴Уго тон, ас эрказ будйсь кыр маслинапу бордысь чогыса уськытэмын ке вал, но, кылдэ-медья ярантэм луыса вылысь, зеч маслинапуд борды лякиськид бере, соку, чик вераськытэк ини, кылдэмзыя аслаз луись, но чогыса уськытэм вайёссэ Инмар ас пудзы борды лякоз-бурмытоз.

²⁵Агай-выньёсы, та ватйськыса улйсь зэмлыкез тйледлы усьтэме потэ, – асьтэ сярысь укыр вылй малпанды медаз кылды шуыса. Язычникёслэн лыдзы тырмыт луыса пырытозлы, – со дырозьлы Израильлэн оглюкетэз Инмарлы тэрытскытэк вог сюлмын улоз. ²⁶Соку быдэс Израиль утиськоз, кызыы гожтэмын:

”Сйонысь Мозмытйсь лыктоз но

Иаковлэн калыкез бордысь

сьольклэсь кышкатэк улонэз быдтоз;

²⁷куке соослэсь сьолькёссэс быдто,

соку Аслэсьтым та сйзён-косонме сёто”.*

²⁸Зеч Иворез кабыл басьтымтэзы понна, Инмар азын соос, тй понна, тушмонёс луизы. Но соос – Инмарлэн быръем калыкез. Вашкала атайёс-сылы луыса, Инмар соосты яратэ. ²⁹Уго Инмар Аслэсьтыз сётэм кузьымёссэ берен уг басьты, быръем адымиосызлэсь уг куштйськы. ³⁰Кызыы тй но вазен Инмарлэсь кылзйськисьтэмесь вал, нош табере соослэн кылзйськымтэзы понна, тйляд

* 11:26-27 Ис. 59:20-21.

сьöлыкъёсты куштэмын. ³¹Табере соос но, тйляд сьöлыкъёсты куштйськем понна, кылзйськисьтэ-месь луизы, – асьсэлэн но сьöлыкъёссы куштэмын мед луозы шуыса. ³²Ваньмызлэсь сьöлыкъёссэс куштон понна, Инмар ваньзэс кылзйськонтэмлэн жильыетаз возиз. ³³Э Инмарлэн тодонэзлэн, визь-лыкезлэн пыдэстэм узырлыкез! Валаны луонтэ-месь Солэн судъёсыз, эскерыны луонтэмесь Солэн сюресъёсыз!

³⁴Уго кин Кузё-Инмарлэсь визьзэ тодыны быгатйз ни?

Яке, кин Солэн визь-кенеш сёткаsez вал?*

³⁵Яке, кин Соны, пунэмез берыктэмын

мед луоз шуыса,

азьвыл ик мар ке но сётйз?*

³⁶Уго ваньмыз Со бордысь. Со пыр. Со понна. Соны пумтэм вапумъёсы дан! Аминь.”

12-тй ЛЮКЕТ

¹Озьыен, агай-выньёсы, Инмар асьмеды гажа-жаля. Соин ик тйледыз сьулворыса курисько: асьтэлэсь быдэс улондэс дун-сьöлыктэм, ярамон карыса, курбонэз кадь, Инмарлы сётэлэ. Та луэ визьмын валаса Инмарлы служить карон. ²Туала вапумысь улонлэн куронъёсызлы тупатскыны турттыса эн улэ. Нош тй асьтэлэсь лулдэс-сьулэм-дэс выльдэ-воштэ, тодыны мед быгатоды: мае

* 11:34 Ис. 40:13.

* 11:35 Иов. 41:3.

тйлесьтыд Инмар возьма, кыче уж Солы жеч, ярамон, дун-шектэм луэ.

³Инмарлэн сётэм дэлетэныз, котькуддылы мон шуисько: көня сётэмын, солэсь вылье асьтэдыз эн пунктэ. Инмарлэн котькуддылы сётэм осконэзлэн мертэтэтэзья, зйбыт-востэм кариськыса, визьмо малпанэн улэ. ⁴Уго, кызьы одйг мугорамы трос люкетъёсыз, но котькудйзлэн люкетлэн аслаз кулэлыкез, ⁵озьы ик асьмеос но: асьмеос трос чошен, нош Христосэн огазе кариськиськомы ке, соку одйг мугор кылдытиськомы. Нош нимамамы ке – ог-огмылы пөртэм люкетъёс луиськомы. ⁶Инмарлэн асьмелы сётэм дэлетэныз, асьмелэн пөртэм пумо быгатонлыкъёсмы вань: Инмарлэсь кылзэ ивортон, – сое осконлэн косонэзья-куронэзья лэсьты. ⁷Юрттйськыса улйсь ке тон, юрттйськыса ул. Дышетйсь ке, – дышетыса ул. ⁸Буйгатйсь ке, – буйгаты. Сёткась ке, вылтйяськытэк сётка. Кивалтйсь ке, тыршыса кивалты. Жеч уж лэсьтйсь ке, жеч ужез капчи мылдыдын лэсьты.

⁹Яратонды чылкыт сюлмысьтыды потэмын мед луоз. Урод ужез адзонтэм каре, жечез борды лякиське. ¹⁰Агай-выньёс кадь, гажаса ог-огеныды улэ. Мукетъёссэ асьтэ сярысь умоесьгес луо шуыса лыдьялэ. ¹¹Тыршыса, дугдылытэк, духеныды жуатскыса, Кузё-Инмарлы ужалэ. ¹²Оскиськонды ваньлы шумпотэ. Куректон-кайгу лыктыку, чида-сесь луэ. Дугдылытэк вöсяськыса улэ. ¹³Вöсяськисьёс шуге-леке сюрюку, соослы юрттйське. Пыдйылчиосты гуртады вайыса сюдэ-вордэ. ¹⁴Тйледыз уллясьёсты-ултйясьёсты бакель каре; эн

юриське, эн каргаське, бакель каре. ¹⁵Шумпотйсь-ёсын ёош шумпотэ, бёрдйсьёсын ёош бёрдэ. ¹⁶Кусапады огкылысь, тупаса улэ. Асьтэдыз вылие эн пунктэ, востэмьёслэсь-зйбытьёслэсь адзем карыса улэ. Асьтэдыз асьтэос визьмоесь-йёноесь шуыса эн лыдьялэ. ¹⁷Нокинлы но уродлы пумит уродэн пунэмзэ эн берыктэ. Вань адямиослы зеч лэсьтон сярысь сюлмаське. ¹⁸Быгатэмдья, вань адямиосын тупаса улэ. ¹⁹Гажаноосы, тйледлы урод лэсьтйсь-ёслы пунэмзэ эн берыктэ, Инмарлэн вожпотонэзлы инты кельтэ. Гожтэмын уго: ”Мон – пунэм берыктйсь, Мон пунэмзэ берыкто”, – шуэ Кузё-Инмар”. ²⁰Тй лэсьтэ тазы: ”тушмонэд сютэм ке, сюд сое; сюэз куасьме ке, секта сое. Тазы лэсьтыса, солэн йыр вылаз кисьтыны жуась эгырьёс люкалод”. ²¹Уродлыклы вормыны эн сётйськы, уродлыкез зечлыкен вормы.

13-тй ЛЮКЕТ

¹Котькудйз адями вылй властьёслы-кивалтйсь-ёслы тэрытскись мед луоз. Уго котькудйз власть Инмар дорысь потэ, котькудйз власть Инмарен пунктэмын. ²Соин ик, кин властьлы пумитьяське, со Инмарлэн пуктонэзлы-косонэзлы пумитьяське. Пумитьяськисьёс асьсэды судэ сётонлы дасяло. ³Уго кивалтйсьёс зеч ужьёс понна кышкытэсь өвёл, урод ужьёс лэсьтэм понна соос кышкытэсь. Властьлэсь кышкатэк улэмед потэ-а? – Зеч уж лэсьты. Соку соос тонэ ушьялозы. ⁴Кивалтйсьёс

– со Инмарлэн медоосыз уго, соос тыныд зеч лэсьтыны тыршыса уло. Нош урод уж лэсьтйськод ке, кышка: соос юнме шоры палаш уг нулло. Соос Инмарлэн медоосыз, урод уж лэсьтйсьёслы вожзэ поттыса пунэмзэ берыктйсь. ⁵Соин ик вож поттонлэсь кышкаса гинэ өвёл, возытлыкез тодыса но кивалтйсьёслы тэрытскыса улыны кулэ. ⁶Со понна ик тй выт но тыриськоды: соос Инмарлэн ужасьёсыз, пырак чөже та ужен вырисьёс. ⁷Озыен, кинлы мар сётонды вань, сое сётэ: кинлы тыриськон – тыриськон, кинлы выт – выт; кинлы кышкан – кышкан; кинлы сй-дан – сй-дан.

⁸Нокинлы но, номырин но пунэм тыроно луыса эн кыле, – ог-огдэс ваче гажан сяна. Кин матысьсэ яратэ, со Инмар законэз быдэстэ. ⁹Уго ваньмыз та курон-косонъёс: ”азон-калгон съёлыке эн пыр”, ”эн виы”, ”эн лушкаськы”, ”өрекчаськыса өвөлтэмзэ эн вера”, ”кулэ эн кары”, – ваньмыз та курон-косонъёс, кылемъёсыныз чөш, огкылысь шуо: ”Матысьтэ астэ ачид кадь ик яраты”. ¹⁰Яратон – матысьлы уродзэ уг лэсьты. Соин ик, яратон – со Инмар законэз быдэсьян.

¹¹Көлэмысь султон дырмы-часмы вуиз ини шуыса тодйськомы: асьмелэн утиськонмы али матэгес луиз, соку гинэ оскыны кутскем дырен чөшатыса. ¹²Уй ортче но нунал матэ вуэ. Озыен, пеймытлыклясь ужёссэ палэнтومه но югытлыклясь ожмаськон тйрлыкеныз шобырскоме. ¹³Ваелэ Инмарлы ярамон улومه озыы, кызыы югыт нуналэ улыны кулэ: юонъёслы-кудзонъёслы, азыса-калгыса, керетыса, вожъяськыса улонъёслы сётскытэк.

¹⁴Тйляд дйсяськонды-шобырсконды Кузё-Инмармы Иисус Христос мед луоз. Нош лулмугорды сярись сюлмаськонэз юрзым кулэ кароньёслы эн пөрмытэ.

14-тй ЛЮКЕТ

¹Осконэз ляб муртэ бордады кутэ, но малпаньёсты пумысен соин ченгешыны эн кутске. ²Одйгез лыдья котьмае но сиыны яра шуыса, нош осконэз ляб мурт емыш гинэ сие. ³Сиись мурт сиисьтэм муртэ медаз ултйя. Сиисьтэм мурт сиись муртэ медаз пыкылы: малы ке шуоно, Инмар сое кабыл басьтйз. ⁴Кин тон, муртлэсь ляльчизэ судить карыны? Аслаз кузёез азын со я сылэ, я усе; но султытэмын луоз, малы ке шуоно, Инмар кийн кужым сое султытыны. ⁵Одйгез лыдья, таиз нунал мукет нуналлэсь дуногес луэ шуыса, нош мукетыз лыдья котькуд нунал ас сяменыз дуно луэ шуыса. Котькудйз мед лэсьтоз озьы, кызьы косэ солэн оскиськыны ярамон луись визьмыз. ⁶Кин кудзэ ке нуналэз сйлы карыса висья, Кузё-Инмар понна висья, нош кин нунальёсты уг висья, Кузё-Инмар понна уг висья. Кин сиське, Инмар понна сиське, малы ке шуоно, Инмарлы сием понназ тау каре. Нош кин уг сиськы, Кузё-Инмар понна уг сиськы, – со но Инмарлы тау каре. ⁷Уго нокин но асьме пöлысь аслыз ачиз понна гинэ уг улы, аслыз ачиз понна но нокин уг кулы. ⁸Улйськомы-а – Кузё-Инмар понна улйськомы, кулйськомы-а – Кузё-

Инмар понна кулйськомы. Соин ик, улйськомы-а, яке кулйськомы-а, – асьмеос Кузё-Инмарлэн.⁹Кулэмъёс но, улэпъёсын но вылын кузёяськон понна уго Христос кулйз, кулэмысь улзыса султйз.¹⁰Нош тон малы бен браттэ судить кариськод? Яке малы тон браттэ ултйяськод? Ведь ваньмы асьмеос Христослэн судаз султомы.¹¹Гожтэмын уго:

”Улйсько Мон, – шуэ Кузё-Инмар,
– Мон азе котькудйз адями
пыдесьяськыса йыбырттоз,
котькудйз калык Инмарез даньяса улоз”.*

¹²Озыы, асьме пöлысь котькудмы Инмар азын кыл кутумы.

¹³Ойдолэ, огмес огмы судить ум карелэ. Эсьмаса, тазыы малпаськыса улэ: ноказыы но медам сёты вал братэлы канжаськыны яке визь сынаськонэ сюрены муг-учыр.¹⁴Кузё-Инмар Иисус борды кариськем берам мон тодйсько, юн оскисько: номыр но ас понназ ачиз кырсь öвöл. Мае ке сое кырсь шуыса лыдьясь адями понна гинэ со кырсь.¹⁵Аслад сиёнэныд браттэ куректонэ уськытйськод ке, соку тон яратонлэн законэзья уд ни лэсьтйськы. Аслад сиёнэныд эн быдты сое, кин понна Христос кулйз.¹⁶Басьтэм зечлыкты сантэмаськон ки улэ медаз сюрэ.¹⁷Инмар Эксэйлык сиён но юон öвöл уго, со – шонерлык, каньыллык, Святой Дух бордын шумпотыса улон.¹⁸Кин тазыы Христослы тырше, со Инмарлы ярамон, адямиослы но гажа-мон.¹⁹Озыен, утчаломе сыче улонэз, кудйз тупаса

* 14:11 Ис. 45:23.

улонэз вае. Ог-огмес валэктыса-дышетыса уломе.
²⁰Сиёнлы луыса Инмарлэсь ужзэ эн сёры: ваньмыз сиён чылкыт. Урод соиз, – сиёнэныд адямиез съольке пыртйськод ке. ²¹Эсьмаса сйль сиытэк, вина юытэк, номыр сычезэ лэсьтытэк улод, – кудйзлы луыса тынад братэд канжаське, яке визь сынаськонэ сюре, яке катытэмме ке. ²²Тынад осконэд вань-а? Инмар азын, аслад пушкад мед луоз. Шудо адями, быръем понназ ассэ ачиз уг ке пыкылы. ²³Нош паймыса-шонаськыса улйсь, сие ке, судэ сюре, малы ке шуоно, со осконъя өвөл. Нош ваньмыз, мар осконъя өвөл, со – съольк.

²⁴Дан Инмарлы, мынам Зеч Иворен тодматэменым, Иисус Христос сярись тодытэме пыр, тйледыз осконэн юнматыны Быгатйсьлы. Христослэн Зеч Иворез – со пумтэм вапумьёс чоже ватйськыса улэм зэмлык. ²⁵Со али дыре усьтйське пророкьёслэн гождьямьёссы пыр. Пырак даурьёс чоже улйсь Инмарлэн косэмезья, вань калыкьёслы со али тодмо луиз ни, – ваньзы соос оскись, Инмарлы тэрытскись мед луозы шуыса. ²⁶Одйг гинэ ваньмызлэсь визьмо Инмар, Иисус Христос пыр, пумтэм вапумьёс чоже дано мед луоз. Аминь.

15-тй ЛЮКЕТ

¹Асьмеос, кужмоос, катытэммемяёслы секытлык-сэс нуллыны мед юрттйськомы. Асьмелы гинэ асьмеос зеч лэсьтыны кулэ өвөл: ²котькудмы ась-

меос матысьмылы жеч лэсьтыны кулэ, умойлы, валэктон-дышетонлы. ³Уго Христос но Аслыз гинэ жеч өз лэсьты, но кызы гожтэмын: "Тонэ курласьёслэн урод веранъёссы Мон вылэ усизы". ⁴Нош ваньмыз, мар азьвыл гожтэмын вал, гожтэмын асьмемыз визьман-дышетон понна. Чидан пыр, Священной Гожтэм пыр мылкыдмес жутыса, асьмеос оскиськыса мед уломы шуыса. ⁵Иисус Христослэсь адзем карыса, куспады огкылысь мед улоды шуыса, Инмар тйледлы чидан но буйгатскон мед сётос. ⁶Огсюлмысь, огымысь тй мед данъялоды Инмарез, Кузё-Инмармылэсь Иисус Христослэсь Атайзэ.

⁷Инмарлэн данлыкез понна, кызы тйледыз Христос кабыл басьтйз, тй но огдэс огды кабыл басьтэ. ⁸Атайёслы сётйськем сйзиськонъёсты быдэстон понна, Инмарлэн оскиськымонэз тодмо луон понна, Иисус Христос вандйськемъёслы служить карись луиз шуыса верасько. ⁹Нош язычникъёслы – гажан-жалян понна, Инмарез мед данъялоды шуыса, кызы гожтэмын:

"Со понна мон Тонэ, Кузё-Инмаре,
мурт выжыос пöлын данъяло,
Тынэсьтыд нимдэ ушъяса кырзало".*

¹⁰Эшшо шуэмын на:

"Вань выжыос, Инмарлэн калыкеныз ёш шумпотэ-шулдырьяське".*

* 15:9 Пс. 17:50.

* 15:10 Втор. 32:43.

¹¹Эшшо:

”Язычникъёс, ваньды Кузё-Инмарез ушъялэ!
Вань калыкъёс, Сое мед данъялозы”.*

¹²Озъы ик Исаия но шуэ:

”Иессейлэн выжыысьтыз пушъет жутскоз,
Со язычникъёсын кивалтыны лыктоз;
соос Солы оскиськыса улозы”.*

¹³Оскиськонлэн Инмарез тйледыз котькыче но шумпотонэн, осконды пыр каньыллыкен тыр мед кароз, Святой Духлэн кужыменыз тйлесьтыд оскиськондэс мед узырмытоз.

¹⁴Агай-выньёсы, мон ачим но тй пумысен оскисько: тйляд асьтэлэн но трос зечлыкты. Трос тодйськоды-валаськоды но ог-огдылы визьнод сётылыны быгатйськоды. ¹⁵Агай-выньёсы, нош мон тйледлы өжытак кышкатэк гожтоно кариськи, пичияк ке но, тйледлы тодады вайытон понна: Инмарлэн мыным сётэм дэлетэныз, ¹⁶язычникъёс дорын Иисус Христослэн ужасез, но Инмарлэсь Зеч Иворзэ тодытыса вöсьясконъёс ортчытьясь луонэ пумысен. Святой Духен дун-сьöлыктэм карем, Инмарлы ярамон курбонэз кадь язычникъёсты Солэн кияз сётон понна. ¹⁷Озъыен, Иисус Христос бордын, Инмар понна лэсьтэм ужъёсыным мон ушъяськыны быгатйсько. ¹⁸Мон номыр сычезэ-тачезэ вераны уг дйсьтйськы, мае Христос мон пыр язычникъёсты кылын но, ужен но тэрытскись карон понна, ¹⁹паймымон тодметъёслэн но

* 15:11 Пс. 116:1.

* 15:12 Ис. 11:10.

паймымон ужъёслэн кужыменызы, Инмар Дух-лэн кужыменыз өз лэсьты. Озыы, Христослэсь Зеч Иворзэ Иерусалимысен но солэн ёросысеныз кутсыса Иллирикозь мон вёлмытй. ²⁰Зеч Иворез тодытыны ой тыршы отын, кытын Христослэн ни-мыз тодмо ни вал, – муртлэн пуктэм инъет вылаз лэсьтйськыны медам кутскы шуыса, ²¹но кызыы гожтэмын:

”Со сярсы кинлы ивортэмын ой вал, адзозы, нош кинъёс өз кылэ – валалозы”.*

²²Та муг ик мыным трос пол люкетйз тй доры лыктыны. ²³Али со шаеръёсын мукет ужъёсы өвёл ни, нош тй доры лыктыны кемалась мылкыды вань бере, соин ик, ²⁴Испание мыныны сюрес вылэ потй ке, тй доры лыкто. Оскисько, татй ортчыкум тйледын адзисько но коть ожыт ке но, тйледын вераськыса көтме тырем берам, тй монэ отчы келялоды шуыса. ²⁵Нош али мон Иерусалиме мынйсько, отысь вöсьяськись калыклы юрттйськон понна. ²⁶Македонияысь но Ахаияысь черкъёс Иерусалимысь вöсьяськисьёс пöлысь куанеръёслы юрттэт сётон понна мар но со бичаны сюлмысь тыршо. ²⁷Ярам ойдо, соос азын соослэн пунэм тыронзы вань: лулэз утён узырлыксэс язычникъёсын шори люкизы бере, язычникъёс но соослы шугадзонэ сюрыкузы юрттйськыны кулэ. ²⁸Та ужез быдэстй ке, но та бичам арбериосты соос кие сётй ке, Испание потыкум, тй доры пыраса кошко. ²⁹Мон тодйсько, тй доры вуи ке, Христослэн Зеч Иворезлэсь бакельлыксэ пачылаз ваё шуыса.

* 15:21 Ис. 52:15.

³⁰Агай-выньёсы, сьолворыса тйледыз курисько Кузё-Инмармылэн Иисус Христослэн нимыныз, Духлэн сётэм яратонэныз: мон понна, монэн ёош Инмарлы вöсьяське. ³¹Иудеяын Инмарлы тэрытскытэк улйсьёс мыным уродзэ медаз лэсьтэ вал, нош Иерусалимысь вöсьяськись калык мынэсьтым ваем юрттэтме кабыл мед басьтысал шуыса вöсьяське. ³²Инмарлы та ярамон ке, шумпотыса тй доры лыкто но тйледын валче сьолэм шумпотонэн куаныса уло. ³³Каньыллыклен Инмарез тйледын валче мед луоз. Аминь.

16-тй ЛЮКЕТ

¹Тйледыз тодматйсько асьмелэн сузэренымы, Фиваен, Кенхрей черкысь дьякониссаен*. ²Кузё-Инмарлэн нимыз понна сое бордады кутэ но кызы кулэ вöсьяськись калыклы, солэн кыче ке кулэськоньёсыз луизы ке, озьы юрттэ солы. Со уго ачиз но тросэзлы юрттйськыса улйз, мыным аслым но.

³Монэн ёош Иисус Христослы ужанын юрттйськисьёсылы, Прискиллалы но Акилалы салам вералэ. ⁴Мынам лулы понна соос асьсэлэсь йырзэс öжыт гинэ öз быдтэ. Мон гинэ öвöl, язычникёс пöлысь потэмьёслэн но вань черкьёссы соослы тау каро. Соослэн гуртазы вöсьяськыны люкаськись черк калыклы но салам вералэ. ⁵Мынам

* 16:1 Христианьёс пöлын юрттйськись карыса пунктэм.

гажано эшелы Епенетлы салам вералэ. Ахаияын улйсьёс пöлын со нырысь ик Христос пала берытскиз. ⁶Мариамлы салам вералэ, тй понна со трос ужаз, трос лэсьтйз. ⁷Андроникен Юниялы салам вералэ, мынам чыжы-выжыосылы, монэн чош жильетын пукемьёслы. Апостольёс пöлын соосты жеч тодо. Христос пала мынэсьтым азьлогес соос берытскизы. ⁸Амплийлы салам вералэ, Кузё-Инмар бордысь мынам гажано муртэлы. ⁹Урбанлы салам вералэ, милемын огазын Христослы ужасьмылы; гажано Стахиелы но салам вералэ. ¹⁰Апеллеслы салам вералэ, Христос понна оскиськымон луонэз солэн эскеремын ни. Аристовуллэн юртысьтыз оскисьёслы но салам вералэ. ¹¹Мынам чыжы-выжыелы Иродионлы салам вералэ. Наркисслэн юртысьтыз Кузё-Инмарлы осконэн улйсьёслы салам вералэ. ¹²Кузё-Инмар понна ужасьёслы Трифенэн Трифослы салам вералэ. Гажано Персидалы салам вералэ, кудйз Кузё-Инмар понна трос ужаз. ¹³Кузё-Инмарен бырьем Руфлы, но солэн анаезлы салам вералэ, со мон понна аслам вордэм анае кадь ик дуно. ¹⁴Асинкритлы, Флегонтлы, Ермлы, Патровлы, Ермийлы но соосын огазысь мукетъёсызлы но агай-вынъёслы салам вералэ. ¹⁵Салам вералэ Филологлы но Юлийлы, Нирейлы но солэн сузэрезлы, Олимпанлы, – соосын огазын улйсь вань вöсяськись калыклы. ¹⁶Святой чупанэн огдэс огды жечкылалэ. Христослэн вань черкъёсыз тйледлы салам верало.

¹⁷Агай-выньёсы, сюлворыса курисько тйледыз: дышетонлы пумит, кудйзлы тй дышетэмын, люкиськонъёс, визь сынаськонъёс лэсьтисьёслэсь чаклаське, соослэсь палэнске. ¹⁸Сыће адямиос уго Кузё-Инмармылы Иисус Христослы уг ужало, соос асьсэлэн кётсылы ужало. Небыт, чебер кыльёсын огшоры муртъёслэсь сүлэмзэс-визьзэс тугало. ¹⁹Тйляд кылзйськись-тэрытскись луэмды ваньмызлы тодмо. Соин ик мон тй понна шумпотйсько, но мылкыд карисько: зечлы визьнодоесь, нош урод уж лэсьтыны быгатйсьтэмесь тй мед луоды. ²⁰Асьмелы каньыллык сётйсь Инмар жоген шайтанэз тйляд пыд улады сузмытоз. Кузё-Инмармылэн Иисус Христослэн дэлетэз тй бордын мед улоз.

²¹Мынам ёош ужасе Тимофей, ёыжы-выжыосы Луций, Иасон но Сосипатр тйледлы салам верало. ²²Кузё-Инмарлэн нимыныз мон но Тертый, та келянэз гождьясь, тйледлы салам верасько. ²³Тйледлы салам вера Гаий, монэ ас дораз сюдйсьвордйсь, черк калыкез аслаз корказ люкась. Тйледлы салам верало карлэн казна утисез Ераст но Кварт брат.

²⁴Кузё-Инмармылэн Иисус Христослэн дэлетэз ваньды бордын мед улоз. Аминь.